

Uunga siunnersuut: Greenland Oil Spill Response A/S pillugu Inatsisartut inatsisaat
 (Naalakkersuisut Siulittaasuat)

Akissuteqaat

(Naalakkersuisut Siulittaasuat)

Aappassaaneerinninneq

Inuussutissarsiornermut Ataatsimiititaliap Greenland Oil Spill Response A/S pillugu Inatsisartut inatsisissaattut siunnersuummik sukumiisumik misissuineranut qujanaq.

Inuussutissarsiornermut Ataatsimiititaliap isumaliutissiisummi imm. 5-im
 Naalakkersuisunut qinnutigaa inuussutissarsiornermi politikk
 ikkut misissueqqissaarisoqarnissaanik Inuussutsissarsiornermut Ataatsimiititaliap
 ilimaginninera uppernarsaqqullugu:

*"Ataatsimiititaliali paasinninera unaavoq, tassalu Naalakkersuisut aaqqissuussinermik
 taassuminnga toqqaanerat aammattaq inuussutissarsiornermi politikkikkut siunertaqartoq,
 kalaallinillu suliffeqarfiutaartoqarsinnaaneranut ineriertortitsinissamut
 tunngavileeqataassasoq, oliesiornermi oliemik mingutsitsisoqarnerani
 upalungaarsimasoqarnikkut pisariaqartitsinermi sullissisinnaasumik.*

*Taamaalilluni ataatsimiititaliap ilmagisinnaavaa, Naalakkersuisut GORS A/S-imik
 pilersitserusunnerat inuussutissarsiornermi politikkikkut periarfissanik misissuisimanermi
 tunngaveqartoq, tassalu aatsitassarsiornerp Kalaallit Nunaata aningaasarsiornikkut
 inuussutissarsiutitigullu ataatsimut ineriertortitsinissamut pilersitsinissamullu
 tapertarineqarnissaa Naalakkersuisut anguniagassarisaasa atuutilersinnissaat.*

*Ataatsimiititaliap ilmagisinnaavaa, misissuisimaneq tamanna upalungaarsimanissamut
 atortunik annertuunik Namminersorlutik Oqartussat tigusinissaannut Cairn Energymik
 isumaqatigiissuteqarnerat sioqqulluguli pisimassasoq. Isuma tamanna pillugu inatsisissatut
 siunnersuutip aappassaaneerneqarnissaanut Naalakkersuisut akissuteqaamminni
 uppernarsassagaat ataatsimiititaliap qinnutigissavaa."*

GOSR A/S-imik pilersitsineq aatsitassarsiornerp Kalaallit Nunaata aningaasarsiornikkut
 inuussutissarsiutitigullu ataatsimut ineriertortitsinissamut pilersitsinissamullu
 tapertarineqarnissaanik Naalakkersuisut anguniagaannut naapertuummat aammalu GOSR
 A/S-imik pilersitsineq anguniakkamut tamatumunnga naleqqussarneqarmat Naalakkersuisunit
 uppernarsarneqarsinnaavoq. Taamaalilluni GOSR AS-ip suleriaasissaanik aamma
 suliarinnittooqarpoq kiisalu niuerermik tunngaveqartumik atugassarititaqluni GOSR AS-ip
 sinneqartooruteqarnissamut periarfissai nalilorsorneqarlutik.

Inuussutissarsiornermut Ataatsimiititaliap imm. 5.1-imi Naalakkersuisut qinnuigai siunnersuutip aappassaaneerneqarnissaanut akissuteqaamminni upternarsassagaat "Namminersorlutik Oqartussat sutigulluuniit GOSR A/S-imik piginnittuunini tunngavigalugu taarsiivigitinnissamut suliani inissimalissanngitsoq".

GOSR A/S siunnersuut naapertorlugu aktiaateqarluni ingerlatseqatigiiffit pillugit inatsimmi nalinginnaasumik aaqqissuussineq malillugu ingerlanneqassaaq, tassa siunnersuut tassanngaannit allaanerussuteqanngimmat. Taamaattumik Naalakkersuisunit upternarsarneqarsinnaavoq Namminersorlutik Oqartussat piginnittutut taarsiisussanngortinneqarsinnaanngimmata, tassami Naalakkersuisut aningaasanik nuussuisarnermi periuserineqartartoq malillugu piginnittuuneq ingerlammassuk. Taamaattumik aningaasaqarnikkut siumut naatsorsuutigeriigaanngitsunik kinguneqaateqarnissaa aarleqququtiginagu siunnersuut Inatsisartut akuerisinnaavaat.

Aammattaaq Inuussutissarsiornermut Ataatsimiititaliap imm. 5.1-imi oqaatigaa:
"Inuit Ataqatigiit ilaasortaatitaat inatsisissatut siunnersuutip siullermeerneqarnerani partiit oqaaseqartartuattut oqaaseqaatimini ilaatigut imatut isummersuuteqarpoq:

"Taamaatoqarnerani inatsisit tunngavigalugit Naalakkersuisut
akisussaatinneqarsinnaassanersut qualaajaqqunarpooq, tassami paragraf 11
immikkoortuata aappaani Naalakkersuisut atortutut ullutsinnut
naleqquuttussaanerannut nakkutilliisussatut inissismammata."

Ataatsimiititaliap Naalakkersuisut qinnuigissavai inatsisissatut siunnersuutip aappassaaneerneqarnissaanut akissuteqaamminni upternarsassagaat, pissutsit taamaalersinnaanerat inatsisitigut sillimmartaarfingeqarmat, aammalu Namminersorlutik Oqartussat nakkutilliisussatut pisussaaffeqarnertik tunngavigalugu atortutut ajutuussagaluarpata akisussaatinneqassanngitsut."

Naalakkersuisunit upternarsarneqarsinnaavoq Naalakkersuisut nakkutilliinerisa kingunerisaanik Kalaallit Nunaanni Namminersorlutik Oqartussat taarsiisussanngortinneqarsinnaanngimmata.

Atsaat taarsiisussanngortitsisoqarsinnaavoq nakkutilliisussatut pisussaaffeqartut atortut ajornerat nalunngereersimasuuppassuk imaluunniit nalunngittariaqarsimasuuppassuk, taamaakkaluartorli piginnaatitsisummik pigisaqartoq atortunik pinngitsaaliisummik atueqqusimallugu.

Periarfissaq tamanna siunnersuut naapertorlugu atorneqarsinnaanngilaq, tassa ingerlatseqatigiiffiup kiffartuussineri teknikkikkut unammillersinnaanngitsutut piginnaatitsisummik pigisaqartup upternarsarpagu piginnaatitsisummik pigisaqartoq siunnersummi § 8, imm. 4 aamma 5 naapertorlugit GOSR A/S-imik isumaqatigiissuteqassanngimmat, tamanna atortut pineqartut ajoquteqarpata soorunami taamaattuassaaq.

Piginnaatitsisummik pigisaqartup atortunik ajoqtilinnik atueqqunissaanut Naalakkersuisut periarfissaqanngillat aammalu taamaaliornissartik soqutigisaqarfiginagu, tamannattaaq KANUKOKA-p tusarniaanermut akissutaanut Naalakkersuisut oqaaseqaataanni alassimavoq isumaliutissiisummi imm. 3-mi aamma issuaavigineqartoq:

” Tamanna tunngaveqarpoq GOSR A/S nunat tamat assigiissaarutaat pitsaanerpaaq malillugu kiffartuussutiminik soorunami sullissisinnaasariaqarmat. GOSR A/S’imik pilersitsinermut siunertaanngilaq suliffeqarfimmik aningaasarsiorfiusussamik ingerlatsinissaq, kisiannili nuna tamakkerlugu uuliamik mingutsitsinissamut upalungaarsimaffimmik aallartitsinissaq, aatsitassanut inatsisip piumasaqaatai sakkortuut eqquutsissinnaallugit. GOSR A/S ataatsimut isiginnittumik nunat tamat assigiissaarutaat qaffasissut naapertorlugit kiffartuussutinik sullissisinnaallugit, piginnaatitsisummillu pigisaqartup tamanna upernarsarsinnaappagu, piginnaatitsisummik pigisaqartoq upalungaarsimassutiminik aaqqissuussisinnavaoq kiffartuussutit pillugit GOSR A/S-imik sullississutit pillugit isumaqatigiissuteqarfiginngikkaluarlugu.

Taamaakkaluartoq GOSR A/S’ip unammilleqatigiinnermi, GOSR A/S atortunik amerlangaatsiartunik Kalaallit Nunaanni inissisimatitassaminik pigisaqarnini pingaaruteqartumik iluaqutigissavaa. GOSR A/S teknikkikkut aningaasarsiornikkullu unammillersinnaanngissusia piginnaatitsisummik pigisaqartup upernarsarsinnaappagu, piginnaatitsisummik pigisaqartup ataatsimut isigalugu upernarsarsinnaassavaa, atortut assingusumik taama amerlatigisut Kalaallit Nunaanniittut atorsinnaassallugit. Tamanna eqquutsinneqarpat, uuliamik maangaannartitsinermi upalungaarsimaneq isumannaatsoq eqqarsaatigissallugu pingarnerusutut nalilerneqassaaq, GOSR A/S-imik eqqarsaatiginninnissamit salliutinneqarluni. Periarfissat marluk pitsaaqatigiissut akornanni toqqaaneqassappat, piginnaatitsisummik pigisaqartup arlaat isumaqatigiissuteqarfigissallugu nammineerluni aalajangersinnaavaa. Taamaassanngippat pineqartup aalajangersinnaavaa upalungaarsimaneq tamaat nammineq isumagissanerlugu.”

Ataatsimut isigalugu piginnaatitsisummik pigisaqartup atortut namminneq misissornissaannut piumasaqartuaannarsinnaapput, tassami piginnaatitsisummik pigisaqartoq uuliamik mingutsitsisoqassagaluarpat akisussaatinneqartussammat, taamaattumillu tamatuma sapinngisamik piaernerpaamik unitsinneqarnissaanut saliinissallu aallartinneqarnissaanut aningaasaqarnikkut annertuumik soqutigalugu.

Tamatuma peqatigisaanik oqaatigineqarpoq GOSR A/S taarsiisussanngortinnejassagaluarpat tamanna killeqartorujussuussasoq. GOSR A/S kiffartuussinerminut atatillugu; taakku tassaanerussallutik upalungaarsimanissamut atortunik tunniussineq immaqalu sulisussatigut ilisimasatigullu tapersersuineq; taamaallaat kukkussutinut amigaatinullu taarsiisussaatitaassammat. Aamma mingutsillsilluni annertoorujussuarmik ajutoortoqassagaluarpat, qillerisoqartillugu aniatitsisoqassagaluarpat (“Blow out”), tamanna piginnaatitsisummik pigisaqartup sutigut tamatigut akisussaaffigissavaa aammalu GOSR A/S tamatumunga akisussaatinneqarsinnaanani.

Aammattaaq GOSR A/S-ip akisussaaffia akisussaaffiup atuutsinneqarsinnaaneranut nalinginnaasumik piumasaqaatit malillugit killeqassaaq, tassunga ilanngullugu GORS A/S-ip

isumaqatigiissut naapertorlugu pisussaaffini piaaraluni mianersuaalliorluniluunniit sumiginnarsimagaluarpagilluunniit. Taamaattorli GOSR A/S aniatsisisoqarpat akisussaatinneqanngisaannassaaq.

Inuussutissarsiornermut ataatsimiititaliaq inassuteqaammini naggataatigut oqaatigaa:
” *GOSR A/S-ip ilaannakortumik tamakiisumilluunniit namminersortunngorsarneqarnissaanut pilersaarutaasut aallartinneqarnissaat eqqarsaatigineqalissagaluarpat Naalakkersuisut pilersaarutissatut periarfissaasinnaasunik taamaattunik Inatsisartunut saqqummiussinissaat Inuussutissarsiornermut Ataatsimiititaliap kissaatigaa.* ”

Inatsisartut Aningaasaqarnermut Akileraartarnermullu ataatsimiititaliaata kiisalu Inatsisartut Inuussutissarsiornermut Ataatsimiititaliaata GOSR A/S-ip siunissami namminersortunngorsarneqarsinnaanera pillugu aammattaaq peqataatinneqartarnissaat Inuussutissarsiornermut Ataatsimiititaliap kissaatigaa.”

Namminersorlutik Oqartussat GOSR A/S-imi aktiaataat annikitsukkuutaarlugit tunineqarsinnaallutilu tunineqassasut, taamaalillunilu Namminersorlutik Oqartussat piginneqataanerat annikillisinneqassasoq siunnersuummi siunniunneqarpoq. Tamanna missingersuusiortarneq pillugu inatsit naapertorlugu soorunami pissaaq.

Tassunga atatillugu Inuussutissarsiornermut Ataatsimiititaliap kissaatai Naalakkersuisunit maluginiarneqarput aammalu missingersuusiortarneq pillugu inatsimmi § 1, imm. 3 naapertorlugu Inatsisartut ataatsimiititaliallu susassaqartut soorunami peqataatissallugit, taamaalilluni Kalaallit Nunaanni inatsisinik atuutsitsisut inatsisiortullu akulerussuunneqarnerat nalornissutigineqaqqunagu. Namminersorlutik Oqartussat aktiaataannik tunisinissaq pillugu naliliinermi pissutsit siunnersuummi § 4-mi oqaatigineqartut saniatigut pissutsit allat Naalakkersuisunit eqqumaffigineqarnissaat Inatsisartunit kissaatigineqassappat tamatumunnga allannguutissatut siunnersummik saqqummiussisoqassaaq.

Inuussutissarsiornermut Ataatsimiititaliap pitsaasumik inassuteqarnera aammalu ataatsimiititaliap isumaqatigiittup siunnersuutip akuersissutigineqarnissaa inassutigimmagu Naalakkersuisut nuannaarutigaat.

Taamatut oqaaseqarlunga siunnersuutip akuersissutigineqarnissaa kaammattuutigalugu siunnersuut Inatsisartunut oqaluuserisassanngortippa.